



Sud Bosne i Hercegovine
Sud Bosne i Hercegovine

Broj: S1 3 Iž 043668 22 Iž
Sarajevo, 16.08.2022.godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić Čovrk kao predsjednika vijeća, Vesne Trifunović i Zvezdane Antonović kao članova vijeća, odlučujući o žalbi Seada Čampare sa boravkom u ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine, u nejavnoj sjednici, održanoj dana 16.08.2022.godine, donio je

RJEŠENJE

Žalba se odbija.

Obrazloženje

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine po podnesenim prijavama do 19.07.2022.godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što potpis žalitelja na prijavnom obrascu nije identičan potpisu na identifikacionom dokumentu dostavljenom uz prijavu.

Žalitelj je protiv navedene odluke blagovremeno izjavio žalbu navodeći da potpis nikada ne može biti identičan, a naročito ako se ima u vidu da je potpis na CIPSU elektronski, a na obrascu se zahtijevao potpis olovkom. Moli da se njegova žalba uvaži.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave žalitelja za glasanje izvan BiH dostavljene dana 19.07.2022.godine elektronskim putem u skladu sa Upustom o postupku slanja, prijema, obrade, arhiviranja i zaštite elektronskih prijava državljanina Bosne i Hercegovine za glasanje izvan BiH elektronskim putem („Sl. glasnik BiH“, broj 27/22), utvrdila da potpis žalitelja na prijavnim obrascu nije identičan potpisu na identifikacionom dokumentu koji je priložen uz prijavu.

Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Takođe, nakon obrade prijave žalitelj je putem e-maila obaviješten dana 25.07.2022.godine da njegova prijava za glasanje izvan BiH sadrži nedostatke. Navedene nedostatke žalitelj nije otklonio u ostavljenom roku od dva dana, a koji rok je prekluzivan i ne može se produžavati. Stoga je pravilna odluka CIK BiH da ne dozvoli upis u Izvod iz Centralnog biračkog spiska žalitelju.

Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

***Predsjednik Vijeća
Sudija***

Dinka Bešliagić-Čovrk